

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXIX Blg. 10
Mayo 21, 2008
www.philippinerevolution.net

Editorial

Lahatang-panig na umaabante ang armadong rebolusyonaryong kilusan

Katulad ng nabigong sinundan niya, panay din ang buladas ng bagong Armed Forces of the Philippines Chief of Staff na si Lt. Gen. Alexander Yano. Itutuloy daw niya ang umano'y natamo nang bwelo ng pinalitan niyang si Gen. Hermogenes Esperon upang mawalan ng saysay ang armadong rebolusyonaryong kilusan pagsapit ng 2010. Sinuhayan pa ito ng bulaang pahayag ng amo nilang si Gloria Arroyo na lahat daw ng palatandaan ay nagpapatunay na bumubulusok na ang lakas ng Bagong Hukbong Bayan (BHB).

Pinasisinungalingan ito ng mga ulat ng lahatang-panig na mga pagsulong sa iba't ibang rehiyon at larangang gerilya sa buong bansa. Kabilang dito ang paglaki ng kasapian ng Partido, hukbong bayan at mga rebolusyonaryong organisasyong masa; pagdami ng mga larangan, sona at baseng gerilya; pagtamo ng mamamayan ng mga benepisyo sa pamamagitan ng rebolusyong agraryo at iba pang masisiglang



Mga tampok sa isyung ito...

35 armas, nasamsam
ng BHB sa Mindanao
PAHINA 3

Rebolusyonaryong
pagsulong sa Cagayan
Valley
PAHINA 4

Pangkatong sa
lumalalang kagutuman
PAHINA 9

kilos-masa, at iba pa. Sa larangan ng armadong pakikibaka, di bababa sa 500 taktikal na opensiba ang nailunsad ng BHB noong 2007 hanggang maagang bahagi ng 2008, kung saan daan-daang armas ang nasamsam at signipikanteng bilang ang nasawi sa panig ng kaaway.

Ang lahat ng ito ay naganap sa gitna ng walang batayang pangangalandakan ni Esperon na nabuwag

na raw ng AFP ang 28 larangang gerilya at napipinto na ang pagkawasak ng 10 iba pa sa loob ng kanyang nakaraang 22 buwang panunungkulan.

Kung may ipagpapatuloy man si General Yano sa sinimulan ni Esperon, ito ang pagkakamit ng reaksyunaryong hukbo ng mas marami pang kabiguan sa kabila ng ibayo pang pagmamaliit, panlilinlang at pandarahas bito sa nagrerebolusyong mamamayan. **AB**

Iskemang pabuya ni General Yano, mabibigo

Sa harap ng malaking pagdududa sa unang sinabi ni General Yano na mapapawi ang rebolusyonaryong kilusan pagdating ng 2010, bina-go niya ang pahayag at sinabing mawawalan na lamang ng saysay ito pagdating ng panahong iyon.

Patunay ng kababawan ng mga iniisip na pamamaraan ni General Yano sa pagharap sa paglakas ng mga rebolusyonaryong pwersa ang pinalalaganap niya ngayong pabuyang hanggang tig-P300,000 sa mga yunit na nakapagbabaklas umano ng mga baseng gerilya sa kani-kanilang saklaw. May mga gantimpalang salapi rin daw para sa mga yunit, upisyal o sundalong nakadadakip ng matataas na lider rebolusyonaryo, nakasasamsam ng mga baril sa mga gerilya, at nakatatamo ng kanilang mga target.

Bagamat ngayon lamang inamin, dati nang gawi ng AFP ang

pagbibigay ng pabuya. Katunayan ay pinagkukutsabahan ng mga upisyal ng AFP ang paggawa ng mga bulaang ulat para makapangwarta. Nag-iimbento sila ng mga report tungkol sa umano'y mga operasyon at tagumpay laban sa BHB upang maitala sa rekord nila, maipangalandakan sa masmidya at maibulsa ang badyet para sa mga ito.

Sa "di-upisyal" ngayong pagbasbas ni General Yano sa iskemang pabuya, lalo pang puputakihin ang masmidya ng mga bulaang ulat na magpapalabas na nagtatagumpay ang AFP laban sa BHB.

Masahol pa, dadami pang lalo

ang mga paglabag sa karapatangtao dahil iuulat bilang mga tagumpay laban sa BHB ang pagpaslang sa mga ligal na aktibista, pinaghihinalaang tagasuporta ng rebolusyonaryong kilusan at maging kaniwang sibilyan. Katunayan, sa unang araw pa lamang ng panunungkulan ni Yano, isang lidermagsasaka na sa Davao City ang pinaslang ng mga pwersa ng AFP.

Dahil din sa sistemang pabuya, ang mga pagsalakay sa mga komunidad ng magsasaka at pagsunog sa kanilang mga dampa ay ibabalitang bilang matagumpay na pagbaklas sa kampo ng BHB. Ang mga pwersahang pagpapasuko sa mga sibilyan ay ilalarawan bilang marangiang pagsurender ng mga Pulang mandirigma.

Ang mga buladas at karahasan na nais palaganapin ng rehimeng US-Arroyo at ng AFP sa pamumuno ni General Yano ay sasalubungin lamang ng higit pang mga tagumpay at ibayong pagsulong ng rebolusyonaryong kilusan. Inihahanda at inilulunsad ngayon ng buong rebolusyonaryong kilusan ang lahatang-panig na mga pagkilos at opensiba para sa madagundong na selebrasyon ng darating na ika-40 anibersaryo ng Partido at BHB.

Pinupunuan ngayon ng buong rebolusyonaryong kilusan ang mga rekisito para makapagkamit ito ng mayor na igpaw sa kasalukuyang yugto ng digmang bayan at mapabilis ang pagsulong ng rebolusyon hanggang sa ganap na tagumpay. **AB**



Taon XXXIX Blg. 10 Mayo 21, 2008

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial	
Umaabante ang armadong rebolusyon	1
Iskemang pabuya, mabibigo	2
Matatagumpay na TO	
35 armas, nakumpiska sa Mindanao	3
Mga opensiba sa Bicol at Samar	3
Mga tagumpay sa Cagayan Valley	4
Araw ng Cordillera	5
Arroyo laban sa mga Lopez	6
Bagong ebidensya sa NBN-ZTE	6
Pagsasamantala sa konsyumer ng kuryente	7
Pangkatong sa kagutuman	9
Pati sa Pilipinas	10
Pananalanta ng pasistang estado	
Lider ng KMP sa Davao, pinaslang	11
Paglapastangan sa bangkay ng kasama	12
Balita	13

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas



35 armas, nakumpiska ng BHB sa Southern Mindanao

Tatlumpu't limang armas ang nasamsam ng Bagong Hukbong Bayan (BHB) sa Southern Mindanao sa tatlong taktikal na opensiba sa Davao Oriental, Davao City, Davao del Sur, Davao del Norte at North Cotabato nitong Mayo.

Sa Davao Oriental, sinalakay ng BHB nitong Mayo 19 ang Davao Oriental Provincial Rehabilitation Center sa Mati City. Batay sa mga panimulang ulat, ang mga gerilyang nakaunipormeng militar ay lulan ng sasakyang Elf nang sumalakay sa bilangguan. Walang putok na dinisarmahan nila ang mga gwardya. Pagkatapos ng 30 minuto ay umatras ang mga gerilyang dala ang dalawang M16, dalawang karabin, isang M14, isang kal. 45 pistola, tatlong pistolang 9 mm at isang kal. 22 Magnum rebolber. Nakasamsam din sila ng dalawang radyong ICOM.

Sa Davao del Norte, di bababa sa tatlong M16 ang nasamsam ng BHB nang tambangan nito ang mga elemento ng 1007th Police Mobile Group bandang alas-2:30 ng madaaling araw sa Sityo Tabunan, Barangay Cadunan, bayan ng Mabini. Isang pulis ang namatay at 11 pa ang nasugatan sa naturang ambus.

Kinagabihan, dalawang sundalo naman ang nasugatan, kabilang ang timlider na si Lieutenant Gabawa nang makasagupa ng isang yunit ng BHB ang nagpapatrolyang mga elemento ng 67th IB at PNP Special Action Force sa Upper Huld, San Isidro, Cateel, Davao Oriental.

Bago ito, 10 malalakas na armas ang nakumpiska ng 1st Pulang Bagani Company ng Merardo Arce Command (MAC) ng BHB-Southern Mindanao nang lusubin at disarmahan nito ang mga *security guard* ng despotiko at anti-manggagawang

negosyanteng si Rafael Lorenzo sa Barangay Pangyan, Calinan District, Davao City noong Mayo 11. Nasamsam ang apat na M14, tatlong Garand, isang M4, isang M16 at isang M79 *grenade launcher*.

Kasabay nito ay dinakip din ang badigard ni Lorenzo na si Jose Manero para maimbestigahan.

Sa Davao del Sur, siyam na armas na kinabibilangan ng pitong *shotgun*, isang *grenade launcher* at isang ripleng awtomatik ang nasamsam ng Magtanggol Roque Command nang salakayin nito ang bahay ng lider paramilitar na si Paterno Intes nitong Mayo 8 sa Kapatagan, Digos City. Si Intes, na aktibong sumusuporta sa mga kampanyang militar ng 39th IB at sangkot sa maraming paglabag sa

karapatang-tao, ay namatay sa naturang reyd.

Sa North Cotabato, isang garan at isang *shotgun* ang nasamsam ng BHB nang salakayin ng Herminio Alfonso Operational Command (HAC-BHB) ang detatsment ng CAFGU sa Barangay Anapulon, Arakan. Bago ito, tatlong sundalo ang namatay at 21 ang nasugatan nang tambangan ng HAC-BHB ang mga elemento ng 39th IB sa Ilustre, Roxas, North Cotabato.

Sa isang pahayag nitong Mayo 13, sinabi ng MAC na umaabot na sa 62 taktikal na opensiba ang nailulunsad ng mga yunit ng BHB sa ilalim nito mula nang simulan ng 10th ID noong Abril 3 ang pinakamalawakang operasyong militar nito sa kasaysayan ng rehiyon. Sa kabila ng sabay-sabay na pag-ooperasyon ng 10 batalyon ng AFP sa kabuuan ng Southern Mindanao, nakapagdulot na ang BHB ng katumbas ng isang platung kaswalti sa kaaway. Labinsiyam na sundalo na ang namamatay at 26 na ang nasusugatan sa loob ng limang linggo. **AB**

Mga opensiba sa Bicol at Samar

Tatlong sundalo ang namatay habang isa ang nasugatan sa sunud-sunod na mga labanan sa pagitan ng Philippine Army at Bagong Hukbong Bayan (BHB) sa Bicol at Samar nitong ikatlong linggo ng Mayo.

Isang elemento ng 65th IB ang namatay nang tambangan ng mga gerilya ng Nerissa San Juan Command nitong umaga ng Mayo 19 sa Barangay San Isidro, Pandan, Catanduanes ang naturang yunit militar. Nangyari ang ambus isang oras makaraang bulabugin ng BHB ang yunit ng Reengineered Special Operations Team (RSOT) sa Barangay Panuto ng nasabing bayan.

Dalawang araw bago ito, isa pang sundalo ng 65th IB ang namatay at isa pa ang nasugatan nang harasin ng mga Pulang mandirigma ang naturang yunit sa Barangay Cahan, Bagamanoc.

Sa Northern Samar, isang elemento ng 63rd IB ang namatay sa isang ambus na inilunsad ng BHB sa Sityo Tugbo, Barangay Bato, Gamay noong Mayo 16. **AB**

Rebolusyonaryong kilusan sa Cagayan Valley, lahatang-panig na sumusulong

Ang rehiyon ng Cagayan Valley ay patuloy na nagkakamit ng mga rebolusyonaryong tagumpay sa kabila ng matinding kampanyang militar ng rehimeng US-Arroyo.

Dito nakatalaga ang 5th Infantry Division ng Philippine Army na may apat na regular na batalyon. Maliban pa rito ay narito rin ang mga pwersa ng 21st IB at 77th IB, may tatlong Recon Coy, isang kumpanya ng bandidong Cordillera People's Liberation Army at isang kumpanya ng Marines, bukod pa sa 49th Separate Rifle Coy at mga tauhan ng Police Mobile Group.

Binigyang-prayoridad ng 5th ID ang Cagayan Valley habang diniin ng 502nd Bde ang Timog Isabela-Quirino at tuluy-tuloy din ang pananalakay nila sa Gitnang Isabela nitong nakaraang taon. Malawakang operasyong RSOT ang isinagawa nila sa 24 na barangay sa Cagayan Valley na tumagal nang tatlong buwan hanggang isang taon. Binaso nila ang mga upisyal ng barangay para maging elemento ng CAFGU at magtayo ng mga dagdag

pang yunit nito. Ginipit ang mga aktibista na sumapi rito para di-umano'y "patunayan" nilang wala silang ugnay sa BHB. Dahil dito, sapilitan nilang naitayo ang 19 na yunit ng CAFGU sa rehiyon. Ngunit papaliit na ito ngayon dahil sa lumilina na kontra-magsasakang katangian nito.

Subalit sa halip na humina at mademoralisa gaya ng ipinagmamalaki ng AFP at ng rehimeng Arroyo, lalong sumigla at sumulong ang rebolusyonaryong kilusan dito, ayon sa resulta ng pagtatasa ng tatlong taong praktika ng rehiyon mula 2005 hanggang 2007.

Sa Partido. Dumoble ang kasapian ng Partido at lumaki nang 33% ang bilang ng mga kadre. Dumami nang 48% ang mga lokal na sangay ng Partido at 80% ang naging paglaki ng bilang ng mga komite ng seksyon. Hindi lamang sa bilang ang naging pag-unlad kundi maging sa kalidad ng kasapian. Umabot sa 98% ng kasapian ng Partido sa BHB ang nakatapos ng Batayang Kurso ng Partido. Umabot naman sa 88% ng mga kadre sa BHB ang nakatapos ng intermedyang kurso at nasimulan na ang panimulang pag-aaral ng Abanteng Kurso sa panrehiyong antas.

Sa armadong pakikibaka. Lumaki

nang 20% ang kasapian ng hukbo at mula rito'y nakapagbuo ng mga bagong yunit. Nagtala ng 19 na mga aksyong militar noong 2007 sa porma ng mga ambus, reyd, isnayping at mga operasyong disarm. Sa loob ng tatlong taon, 73% ang nadagdag sa dating bilang ng mga armas ng BHB. Lumaki naman nang 84% ang bilang ng mga baryong may yunit milisya. Umabot din sa 95% ang pagdami ng kasapian nito. Trenta porsyento ang inilaki ng bilang ng mga yunit pananggol (SDU) at 43% ang inilaki ng bilang ng mga tauhan nito.

Dahil sa mga pag-unlad na ito, mas naging masigla ang armadong pakikibaka sa rehiyon. Napangibabawan ng BHB ang mga opensiba ng kaaway at bunga nito'y 49 ang naitalang namatay at di mabilang ang nasugatan sa AFP habang napreserba ng BHB ang lakas-tauhan at rekurso nito. Nakapaglunsad rin sa gitna ng malawakang operasyong militar ng mga pagsasanay pulitiko-militar, mga makilos na pagsasanay ng mga kumpanya, platoon, seksyon at mga iskwad. Naisagawa rin ang mga regular na pagsasanay sa mga indibidwal na teknika sa labanan at nakapagdaos ng kumperensya ng mga upisyal pamulitika sa antas-rehiyon. Bunga nito, nakapagpanday ng mga bagong upisyal at mandirigma na ibayo pang nasubok at nakonsolida sa mga labanan.

Baseng masa. Daanlibong magsasaka ang nakinabang sa rebolusyong agraryo. Naangkin nila ang mga lupang naipaglaban sa mga panginoong maylupa na nangangamkam nito. Napababa ang upa sa lupa at patubig at ang interes sa pautang. Naitaas ang sahod ng mga manggagawang bukid at presyo ng kanilang produkto. Napasigla rin nila ang maraming pangkat-tulungan, napalaganap ang pagtanim ng palay, mga gulay at puting mais na hindi nangangaila-



ngan ng maraming abono at pestisidyo. Gumana rin ang mga organisasyong masa sa pagpapaunlad ng produksyon at pagtatanim ng iba't ibang klaseng produkto. Pinaunlad rin ang sama-samang paggawa sa kanilang mga barangay.

Naipursige ang pagpapabuti ng serbisyong pangkalusugan sa mga baryo, nakapagtatag ng mga botika, pinalaganap ang mga pamamaraan sa paglaban sa sakit na malarya at nagsanay ng mga komite sa kalusugan sa mga baryo para makaiwas at makapanggamo sa iba't ibang sakit na dumadapo sa lugar. Nakapagtatag ng mga kooperatiba at nakapaglunsad ng mga operasyong rehabilitasyon at *relief* sa panahon ng kalamidad. Napababa ang pamasahé. Sa tulong ng pakikipagkaisang prente, naayos ang ilang kalsada at nakapagpakabit ng kuryente ang ilang liblib na lugar, bagay na nakapagbigay ng kagyat na ginhawa sa naghihirap na masa.

Nakapaglunsad rin sila ng kampanyang masa para mabigyang-proteksyon ang kalikasan. Malawakang edukasyon ang ipinatupad ng Hukbo at panawagan para sa reporestasyon at proteksyon ng mga *watershed*. Organisadong itinakda ang mga lugar na hindi dapat putulan ng mga punongkahoy, karaniwan sa mga nanunumbalik na kagubatan. Mahigpit na nilalabanan ang walang habas na *quarrying* na nakasisira sa sakahan ng daan-daang pamilya sa isang larangan.

Sa kabila ng mabangis na Oplan Bantay Laya, nakapagpatatag at nakapagpalawak ang rebolusyonaryong kilusan sa Cagayan Valley. Tiyak na mas maraming tagumpay pa ang aanihin dito sa buhay at kamatayang pakikibaka ng mamamayang nag-uumpaw na sa pagkasuklam sa estadong nagdudulot ng lahat ng kanilang kahirapan. **AB**

Pagdiriwang ng ika-24 na Araw ng Cordillera

Pagkakaisa laban sa mga dambuhalang minahan

Nagkaisa ang mga dumalo sa ika-24 na pagdiriwang ng Araw ng Cordillera noong Abril 24 na labanan ang malakihan at komersyal na pagmimina sa kanilang mga lupang ninuno. Pinagkaisahan ng mga pinuno ng tribong Binongan sa harap ng 3,000 delegado ang pitong puntong kasunduan kung saan nanumpa silang ipagpapatuloy ang kanilang pakikibaka laban sa Olympus Pacific Mining Inc., isang kumpanyang Canadian, at pigilan ang pagpasok ng iba pang malalaking minahan sa kanilang lupang ninuno. Ang lupang ninuno ng mga Binongan ay katumbas humigit-kumulang ng 11 barangay na sakop ng bayan ng Baay-Licuan sa hilaga-silangang Abra, malapit sa hangganan ng prubinsya sa Kalinga.

Nagsimula ang paghuhukay ng Olympus sa baryo ng Capcapo sa Baay-Licuan noong Pebrero 2007. Napatigil ito ng mamamayan noong Agosto 2007 matapos ang limang buwang pagpepetisyon sa mga awtoridad. Subalit nagpilit pa rin ang Olympus na pumasok sa pamamagitan ng pag-iikot sa mga barangay ng Lenneng, Bonglo, Poblacion, Cawayan, Domenglay, Mogao, Bulbulala, Tumulip, Nalbulan at Subagan at pagkumbinsi sa mamamayan dito na payagan ang kanilang mga operasyon. Para "mapalambot ang lupa" para sa muling pagpasok ng Olympus ay ibinalik ang 41st IB noong Enero sa mga baryong kanugnog ng

Capcapo.

Dahil dito, nakasaad sa kasunduan ang pangangailangang maging patuloy na mapagbantay laban sa pagtatangka ng Olympus at iba pang mga higanteng minahan na labagin at manipulahin ang karapatan ng mga komunidad na makonsulta at mahingan ng pahintulot batay sa wastong impormasyon at bago ang anumang aksyong gagawin ng mga minahan. Patuloy na gumagamit ng dahas at panlinlang ang Olympus, makapagoperasyon lamang ito, kahit malon nang inilinaw ng mga komunidad ng tribong Binongan na bawal ang pagpasok, eksplorasyon at operasyon ng Olympus at mga kasosyo nitong Abra Mining and Industrial Corp. (AMIC) at Jabel Corporation.

Mariin ding nakasaad sa kasunduan ang hindi pagkilala ng tribong Binongan sa Mining Act of 1995 dahil ginagawa lamang nitong ligal ang pagdambong sa mga rekursong mga pambansang minor, laluna sa kanilang mga lupang ninuno. **AB**



Mga pakana ni Arroyo laban sa mga Lopez

Pinupuntirya ngayon ni Gloria Arroyo ang pamilya Lopez at mga ari-arian nila para may mapagbalingan siya ng mga atake sa harap ng sunud-sunod na paglalantad ng korapsyon, kasinungalingan at iba pang kabulukan at mga krimen niya. Matagal nang naghahagilap si Arroyo ng pambala laban sa pamilyang Lopez dahil sa pagtangga nilang yumuko sa kanya at dahil kritikal sa kanya ang ABS-CBN, ang makapangyarihang kumpanyang masmidya ng mga Lopez. Itinuturing ni Arroyo na malaking sagabal sila sa plano niyang makapagpatuloy sa kapangyarihan lampas sa 2010.

Pinakabulnerableng target sa mga pag-aari ng mga Lopez ang Manila Electric Co. (MERALCO) dahil sa sobra-sobra rin nitong kasakiman at pagsasamantala. Itinyempo ni Arroyo ang pag-atake sa MERALCO at pamilyang Lopez sa panibago na namang pagtataas ng singil sa kuryente nitong huli nang 97.53 sentimo bawat *kilowatt hour* para kunwa'y interes ng nakararaming naghihirap na konsyumer ng kuryente ang nasa isip niya.

Sa maksimum, hangad pa sana ng rehimen na mapagkaitan ng baseng pang-ekonomya ang mga Lopez para mabawasan din ng suporta ang oposisyon, mapilay ang ABS-CBN at mapilitang makipagkasundo ang mga Lopez kay Arroyo. Tina-tangka ng rehimen ng Arroyo na agawin mula sa mga Lopez ang kontrol sa MERALCO sa pamamagitan ng Government Service Insurance System (GSIS) at iba pang ahensya ng guberno na may hawak sa 33% ng mga sapi ng kumpanya. Pagbobotohan ito sa pulong ng mga *stockholder* sa Mayo 27. Mahirap nga lamang asahan na maaagaw ng pangkating Arroyo ang kontrol sa MERALCO dahil bukod sa 33.4% saping direkta nang hawak ng mga Lopez, maaari pang makuha ng pamilya ang 9% na boto ng mga may hawak ng *retirement fund* ng mga upisyal at empleyado ng MERALCO bukod sa iba pang impluwensyadong *stockholder*.

Samantala, mariing tinututulan ng Confederation for Unity, Recognition and Advancement of Govern-

ment Employees (COURAGE) at mga empleyado ng GSIS ang plano ni GSIS Chairman Winston Garcia na isugal ang kanilang pondong pensyon sa gera ng rehimen ng Arroyo laban sa MERALCO. Anila, ang mga

empleyado ng guberno ang siyang kolektibong nagmamay-ari ng GSIS at hindi si Garcia kaya wala siyang karapatang gamitin sa gayong paraan ang pondo nito. Sa kadulu-dulahan, ang pag-agaw ng MERALCO mula sa mga Lopez ay papabor lamang kina Arroyo at kanyang mga kroni tulad ng mga Aboitiz (na may interes sa produksyon ng kuryente) at Razon (na may interes sa transmisyon ng kuryente). Mula sa monopolyo ng mga Lopez, mapunta lamang ang MERALCO sa monopolyo ng pangkating Arroyo. **AB**

Bagong ebidensya laban kay Arroyo sa anomalyang NBN-ZTE, lumitaw

Lumitaw nitong Mayo ang mga litratong nagpapatunay na limang buwan bago pirmahan ang kontrata para sa proyektong NBN-ZTE ay nagpunta sina Gloria at Mike Arroyo, dating Speaker Jose de Venecia, dating COMELEC Chairman Benjamin Abalos at iba pa sa Shenzhen, China para makipagkita sa mga upisyal ng ZTE Corporation.

Sikreto ang pakikipagkita ng mag-asawang Arroyo sa mga taga-ZTE at hindi ito pinakober sa midya. Biglaan ding inimbata sa Shenzhen ang mag-asawang de Venecia na nagbabakasyon noon sa Hong Kong. Ani de Venecia, inimbata siya para mapanatag ang mga upisyal ng korporasyong Chinese na hindi magiging sagabal ang anak niyang si Joey sa pagpapatuloy ng proyekto.

Ang mga litrato ay kuha ng isang nagngangalang "Alex" na kasama sa grupong nagpunta sa Shenzhen. Nasa pangangalaga siya ngayon ng oposisyunistang si Vice Gov. Rolox Suplico ng Iloilo.

Patunay ang mga litrato na matagal nang alam ni Arroyo ang tungkol sa negosasyon hinggil sa proyektong NBN-ZTE at dati na siyang may malaking interes na matuloy ito. Pinabubulaanan nito ang sinasabi ni Arroyo na napag-alaman lamang niya ang mga detalye at kamalian ng kontrata noong bisperas ng pagpirma niya rito noong Abril 2007.

Kung noong una'y todo-tanggi ang Malacañang na nakipagkita nga noon ang mga Arroyo sa mga upisyal ng ZTE, ngayo'y walang magawa ang Palasyo kundi aminin ito.

Nakatakdang tumestigo sa Senado si dating Speaker Jose de Venecia para isiwalat ang mga totoong nangyari sa naturang pagkikita sa Shenzhen. **AB**

Labis na pagsasamantala sa mga konsyumer ng kuryente

Isang panig lamang ng katotohanan ang malaking responsibilidad ng MERALCO at mga Lopez sa mga katiwalian, manipulasyon at sobrasobrang paniningil at pagkamal ng tubo sa pagluluwal at pagbebenta ng kuryente. Mas masahol pa ang pananagutan sa mga ito ni Gloria Arroyo at ng kanyang rehimen.

Pinakapangunahin nang sanhi ng mga ito ang ipinatutupad ni Arroyo na patakarang pribatisasyon at deregulasyon at kaakibat nitong pagsasamantala at katiwalian sa suplay at pagbebenta ng kuryente. Pagkaupong-pagkaupo ni Arroyo noong 2001 ay itinulak niya ang Electric Power Industry Reform Act (EPIRA) na nag-engganyo at nagbigay-daan sa mga batas, batayan, kalakaran at pamamaraan para sumahol pa ang monopolyo sa kuryente at tumaas ang bayarin dito ng mga konsyumer. Di katakata-kang wala pa mang isang taon mula nang maisabatas ang EPIRA ay dumoble na ang singil sa kuryente.

Bunga ng mga ito, nagagawa ng NAPOCOR, Power Assets and Liabilities Management Corp. (PSALM), TRANSCO, Wholesale Electricity Spot Market (WESM), Energy Regulatory Commission (ERC), MERALCO at iba pang kinakasangkapan nilang pampubliko at pribadong kumpanyang nagpoprodyus, nagdedeliber at nagbebenta ng kuryente na magsabwatan para masamantala ang mga konsyumer at mapataas ang singil sa kuryente. Nagagawa nila ito sa pamamagitan ng manipulasyon ng kwenta, pagpapasa sa mamamayan ng mga gastos at utang at iba't iba pang paraan ng pangungupit.

Pinakamalaking katiwalian at paganakaw sa mamamayan ang ginagawa ng rehimen at mga

alipures nito sa pamamagitan ng NAPOCOR na may kontrol sa mahigit 70% ng suplay ng kuryente sa buong bansa. Upang mapaganda umano ang katayuang pampinasya ng baon-sa-utang na NAPOCOR at sa gayo'y maipatupad ang pribatisasyon nito, pagkapasa ng EPIRA ay agad-agad na ipinapasan ng rehimen sa mamamayan ang P200 bilyon mula sa mahigit \$11 bilyong (P550 bilyon) tuwirang utang ng NAPOCOR sa labas ng bansa. Bukod pa ito sa mahigit P770 bilyong pananagutan nito sa mga lokal na pi-

nagkukunan ng kuryente. Walang tigil ang katiwalian, pagkalugi at pangungutang ng NAPOCOR, kaya mayroon pa rin ito ngayong mahigit \$7 bilyon (P350 bilyon) na tuwirang utang sa labas ng bansa. (Balak na namang itago ito ng administrasyon sa pamamagitan ng pagpapasalo sa PSALM at pagpapapasan sa mga konsyumer ng kuryente.)

Upang higit pang maengganyo ang pribatisasyon ng NAPOCOR sa pamamagitan ng pagpapalabas na kumikita ito, sadyang tinataasan nito ang singil sa kuryenteng ipinapasa nito sa mga nagbebenta ng kuryente. Isang paraan para magawa ito ang pagsingil ng mas mataas na bayad sa kuryente kapag ito ay binibili sa mga oras na malakas ang konsumo sa elektrisidad.

Nagbibigay ang NAPOCOR ng malaking diskwento sa mga kumpanyang nasa mga *export processing zone* pero idinadagdag naman ang mga nadiskwento sa sinisingil sa nakararaming naghihirap na konsyumer.

Noong Abril hanggang Agosto ng nakaraang taon, bilang tugon sa pagtataas ng presyo ng petrolyo at krisis sa suplay ng kuryente, biglang bumili ang NAPOCOR ng *coal* mula sa ibayong dagat sa presyong mahigit doble ng umiiral sa pandaigdigang pamilihan. Ibinulsa ng mga namumuno sa NAPOCOR ang \$54 na patong sa presyo kada tonelada o kabuuang P877 milyon para sa 65,000 toneladang *coal*.

Isa pang katiwalian sa NAPOCOR ang sobrang taas na mga sweldo (mahigit P123,000 kada buwan) at paglalaan ng P12 bilyon para sa pagreretiro ng mga manedyer ng NA-



POCOR. Pinagkutsabahan pang samantalain ito ng mga manedyer ng NAPOCOR sa pamamagitan ng kunwang pagreretiro ng 25 manedyer para agad silang makakuha ng mahigit P119 milyong benepisyo. Subalit pagkatapos ay bumalik sila agad sa ahensya. May mga manedyer din ng NAPOCOR na nagtayo ng sariling “independyenteng prodyuser” ng kuryente at nakipagkutsabahan sa NAPOCOR para bilhin sa sobrang taas na halaga ang kaniyang iniluluwal na kuryente.

Sa layuning mapag-ibayo pa ang deregulasyon ng kuryente, binuo ng rehimeng Arroyo ang WESM para magkaroon umano ng “hayag na pampublikong pamilihan” ng kuryente na makaeengganyo ng kumpetisyon sa hanay ng mga independyenteng prodyuser. Ngunit makaraan ang tatlong buwan, sa pamamagitan ng kutsabahan ng NAPOCOR at PSALM ay nagawa nilang manipulahin ang bentahan ng kuryente para pataasin ang presyo nito. Mula P2.72 kada kWh, dumoble ito tungong P4.853. Mismong MERALCO ay umaangal na umabot pa ang presyo sa P7.27 kada kWh sa pamamagitan ng WESM.

Napakabigat ding pasanin ng mamamayan ang ipinapataw na VAT sa kuryente. Ibinubulsa ng MERALCO at iba pang nagbebenta ng elektrisidad ang malaking bahagi ng 12% VAT sa kuryenteng ibinebenta nila. Pare-pareho nilang pinapatawan ng VAT maging ang kuryenteng sinusuplay sa kanila ng mga prodyuser na libre sa pagbabayad ng buwis na ito (mga 25% ng mga prodyuser). Sinisingil at ibinubulsa rin ng MERALCO ang VAT para sa “system loss” (o kuryenteng nawawala dahil sa mga teknikal na problema at pagnanakaw) kahit kung tutuusin ay responsibilidad na dapat ito ng kumpanya. Masahol pa, tusong pinalalabas ng MERALCO bilang “system loss” ang hanggang 72 milyong *kilowatt-hour* na sarili

nitong konsumo sa kuryente na umaabot sa P427 milyon taun-taon.

Bukod sa pakikipagkutsabahan sa mga ahensya ng gubyrerno tulad ng NAPOCOR, WESM at ERC, may sariling pang-aabuso, pandaraya at pagsasamanta sa mga konsyumer ng kuryente ang mga Lopez, gamit ang MERALCO at iba pang kumpanya nila.

Sinasamantala ng mga Lopez ang pag-eenggayo ng EPIRA sa mga nagbebenta ng kuryente na bilhin ang hanggang kalahati ng kinakailangan nilang kuryente mula sa sarili nilang mga kapatid na kumpanya. Habang kinukuha ng MERALCO ang 60% ng kinakailangan nitong kuryente mula sa mga kapatid na kumpanya tuwing patay na oras (para mas mura ang halaga), itinataon naman nito ang pagbili ng iba pang pangangailangan nila mula sa NPC at sa WESM sa mga “peak hours,” kaya mas mahal. Pero itong mas mataas na halaga ang siyang ginagamit na batayan ng MERALCO upang makasingil ng mataas sa mga konsyumer nito.

Binibili rin ng MERALCO ang mga kuntador at poste ng kuryente, *power transmission unit* at kasangkapan sa *information technology* mula sa mga kumpanyang pag-aari rin ng mga Lopez. Pinagmumulan ito ng dagdag na P3 bilyong kita nila bawat taon.

Nakipagsabwatan pa ang MERALCO sa NAPOCOR para “kanselahin” ang P20 bilyong utang nila sa isa’t isa sa pamamagitan ng pagpapa sa lahat ng mga ito sa mga konsyumer ng kuryente.

Ikinakarga rin ng MERALCO sa mga konsyumer ang mga ginagastos nito sa pagpapalawak at mula 1994 hanggang 2002 ay ipinasa rin nito ang P30 bilyong binabayaran nitong buwis sa kita. Ipinasasauli ito ng Korte Suprema sa mga konsyumer, pero hanggang ngayon ay P14.4 bilyon pa lamang ang naiba-

balik ng MERALCO.

Naniningil din ang MERALCO ng deposito sa mga kuntador na umaabot ng P21.4 bilyon mula 2004 hanggang 2007. Sinolo ng MERALCO ang malaking interes na kinita nila mula rito at di ibinigay sa mga nagdeposito. Nahusgahang illegal ito, ayon sa Magna Carta for Residential Consumers, kaya inutusan ng korte ang MERALCO na ibalik sa mga konsyumer ang mga deposito. Hanggang ngayon ay di pa ito nai-patutupad.

Ang napakalaking mga sweldo at pribilehiyo ng mga nagpapalakad sa MERALCO ang isa pa sa mga sinisingil nito sa mga konsyumer. Umaabot sa P97 milyon ang sweldo ng walong upisyal nito at P170 milyon sa mga direktor at iba pang nasa maneydsment.

Kung tutuusin, malaki na ang P3.6 bilyong netong kita ng MERALCO noong 2007. Pero pinalalabas sa ulat pampinansya ng First Philippine Holdings (ang punong kumpanya ng mga Lopez na siyang nangangasiwa sa lahat ng pag-aari nila) na ang pinakamalaking pinanggagalingan ng kita ng mga Lopez ay hindi pa ang MERALCO, kundi ang iba pang kumpanyang itina-ya nila. Ito’y dahil minamanipula ng mga Lopez ang kwenta at nang madisimula ang gahiganteng kintang tinatabo ng MERALCO.

Ang First Philippine Holdings, na siya ring direktang humahawak ng 33.4% sapi ng MERALCO para sa mga Lopez ay umaani ng mahigit P10 bilyong netong kita taun-taon. Nitong nakaraang dalawang taon, P11.7 bilyon at P16.6 bilyon ang netong kita nito.

Napakalaki rin ng kinikita para sa mga Lopez ng mga kapatid na kumpanya ng MERALCO na solo nilang pag-aari. Isa sa mga pinakamalalakas kumita ang First Gas. Mula sa orihinal na puhunan na P8 bilyon lamang ay kumikita na ito ng hanggang P7 bilyon taun-taon. **AB**

Panggatong sa lumalalang kagutuman

Isa sa mga pangunahing sanhi ng salat na suplay at nagtataasang presyo ng pagkain at lumalaganap na kagutuman sa daigdig ngayon ang pagbaling ng malaking bahagi ng mga lupaing nakalaan sa produksyon ng pagkain tungo sa produksyon ng mga *biofuel*.

Dahil sa mas malawak na maaaring pagkunan nito kumpara sa petrolyo, gayon na lamang ang interes ng malalaking pandaigdigang kapitalista sa pagpapalaganap ng produksyon ng *ethanol* at iba pang klase ng mga *biofuel*.

Ang pinakamayayamang bansa gaya ng US ang kumukonsumo ng kalakhan ng nililikhang panggatong sa mundo para sa kanilang industriya, militar, transportasyon at iba pa. Patuloy na lumalaki ang kanilang konsumo ng petrolyo sa harap ng limitado at papaubos nang suplay nito. Dahil dito, at dahil din sa kontrol ng mga imperyalista sa suplay at pamilihan ng petrolyo, patuloy ang pagsirit ng presyo nito. Kinukumpika pa ito ng magulong sitwasyong pampulitika sa Middle East at iba pang pangunahing pinagmumulan ng petrolyo.

Kalakhan ng mga *biofuel* na umano'y mas mura at mas malinis na pamalit sa petrolyo ay nililikha mula sa mga pananim na dati'y nakalaan lamang sa pagkain. Ang mga pangunahing pinagkukunan ngayon ng mga *biofuel* ay mais, tubo, utaw

(soya) at *palm*. Ipinupursigi rin ngayon ang produksyon ng mga *biofuel* mula sa trigo, *barley* at iba pang butil na pagkain. Bagamat may mga halamang di pagkain tulad ng tangan-tangan (*jatropha*) na maaaring pagkunan ng mga *biofuel*, ang maramihang produksyon nito ay sasaklaw ng malalawak na lupaing mas nararapat na gamitin sa produksyon ng pagkain. Makasisira rin sa lupa ang *jatropha* dahil matakaw ito sa tubig.

Napakalaking bulto ng butil ang kailangan para makagawa ng kaunting *biofuel*. Halimbawa, bawat 25 kilo ng mais ay mapagkukunan lamang ng 2.77 galon o 11 litro ng *ethanol*. Samakatwid, ang 60 litro ng *ethanol* na pampuno sa tangke ng isang pangkaraniwang sasakyan ay katumbas na ng 136 kilo ng ma-

is. Katumbas na ito ng mahigit walong buwang pagkain ng isang tao batay sa abereyds na konsumong 200 kilong butil para sa isang tao kada taon.


Kaya na-

man, ani dating presidente Fidel Castro ng Cuba, ang pagpupursigi ng mayayamang bansa para pagibayuhin ang produksyon ng mga *biofuel* ay papatay ng aabot sa tatlong bilyon katao dahil sa gutom. Ayon naman kay Jean Ziegler, Special Rapporteur for the Right to Food ng Unit-ed Nations, ang produksyon ng mga *biofuel* ay isa nang krimen laban sa sangkatauhan. Sa harap ng tumitindi ngayong krisis sa pagkain sa daigdig, nananawagan siya ng limang-taong moratorium sa produksyon ng mga *biofuel*.

Pinakapursigido ngayon ang US na itulak ang produksyon ng mga *biofuel* para makaalpas ito sa nanganganib na suplay at tumataas na presyo ng petrolyo. Ang US ngayon ang nangungunang prodyuser ng *ethanol* sa mundo. Sa udyok ng pinakamalalaking tagagawa ng sasakyan sa US, itinakda ng gubernong Bush noong isang taon na doblehin ang bilang ng mga sasakyang pinaaandar ng *ethanol* sa bansa pagsapit ng 2012. Nakipagkasundo rin ang gubernong Bush sa mga kumpanyang gumagawa ng mga sasakyan na bawasan nang 20% ang pag-asa ng bansa sa petrolyo sa loob ng susunod na sampung taon.

Itinakda naman ng European Union ang paggamit ng mga *biofuel* sa hanggang 5.75% ng transportasyon doon pagsapit ng 2010. Ipinagmamalaki ng France at Germany na matutupad nila ang gayong reki-sito bago pa man ang dedlayn.

Ang naturang mga programa ng pinakamayayamang bansa ay mangangahulugan ng papalaki pang demand para sa mga *biofuel* sa mga susunod na taon. Kakailanganing palawakin pa ang mga lupaing ilalaan sa produksyon ng mga *biofuel* para matugunan ito. Sa European Union, halimbawa, ang target na konsumo ng *biofuel* pagsapit ng 2010 ay mangangailangan ng pag-



papalit-gamit ng 25% ng lupang agrikultural doon.

Syempre, hindi gugustuhin ng mga imperyalista na sarili nilang produksyon ng pagkain ang masagasaan ng produksyon ng mga *biofuel*. Kaya naman paspasan nilang itinutulak ang malakihang produksyon ng mga pananim na pang-*biofuel* sa mga atrasadong bansa. Ilang taon na nilang sinusulsulan at itinutulak ang mahihirap na bansa na magbalangkas ng mga programa at batas para sa pinag-ibayong produksyon ng mga *biofuel*. Noong nakaraang taon, isang kasunduan para sa produksyon ng mga *biofuel* ang pinirmahan ng US at Brazil, na siya na ngayong pangalawang pinakamalaking prodyuser ng *ethanol* sa daigdig.

Pilit itinatatwa ng mga imperyalista at mga papet nila ang pananagutan ng produksyon ng mga *biofuel* sa paglala ng kasalukuyang krisis sa pagkain. Upang pagtakpan ito, ibinabando nila ang umano'y pangmatagalang mga bentahe ng paggamit ng gayong panggatong. Ipinangangalandakan nila na ang paggamit ng mga *biofuel* ay makatutulong sa pagbabawas ng ibinubugang *greenhouse gas* na sanhi ng umiinit na klima ng daigdig (*global warming*). Kwestyunable ang bagay na ito kung susuriin ang sumusunod:

Ang pagbaling sa mga *biofuel* ay hindi mangangahulugan ng malaking bawas sa paggamit ng petrolyo. Sa US, bawat yugto mismo ng produksyon ng *ethanol* ay ginagamitan ng petrolyo at mga nakalalasong kemikal mula sa pataba para sa mais, gasolina ng traktora, panggatong sa pabrika at transportasyon ng pinal na produkto. Sa katunayan, ang enerhiyang mula sa petrolyo na kailangan sa produksyon ng mais ay 30% mas malaki kaysa nalilikhang *ethanol*.

Sa European Union, kalakhan ng mga *biofuel* na kinokonsumo ay inaangkat mula sa Brazil, kung saan tuluy-tuloy na kinakalbo ang kagubatang Amazon para mapalawak ang mga taniman ng tubo at utaw, at sa Southeast Asia, kung saan winawasak din ng papalawak na mga plantasyon ng *palm* ang kagubatan. Ang pagkaubos ng kagubatan ay isa sa mga sanhi ng *global warming*.

Ang malinaw, hindi inaalintana ng mga imperyalista ang kagutuman ng ibinubunga at pasasahulin ng hibang na pagpupursigi sa paglikha ng mga *biofuel*. Papatayin nila sa gutom ang mamamayan ng daigdig, matugunan lamang ang pangangailangan nilang gatungan ang kanilang makasariling interes. **AB**

Pati sa Pilipinas

Naisabatas ang Biofuels Act sa Pilipinas noong Enero 2007 na nag-oobligang mahaluan ng papalaking porsyento ng mga *biofuel* ang petrolyong ibinebenta ng mga kumpanya ng langis sa bansa para mabawasan umano ang pagiging palaasa ng bansa sa importasyon ng petrolyo. Sa ngayon, umaabot na sa ₱34.08 bilyon ang naipupuhunan ng mga kumpanya ng petrolyo at iba pang kumpanya mula sa Australia, Japan, US, China, United Kingdom, Germany at India at kasosyo nilang mga lokal na kumprador para sa produksyon ng mga *biofuel*.

Kabilang sa mga kauna-unahang kumpanyang pumasok sa manupaktura ng *biofuel* ang Philippine National Oil Co. (PNOC) Alternative Fuels Corp. na namuhunan na ng \$2.3 bilyon kasosyo ang NRG Chemical Engineering ng UK. Hanggang isang milyong ektarya ng lupain sa Palawan at Mindanao ang balak nilang tamnan ng *jatropha*. Balewala sa kanila ang pinsalang maaaring idulot nito sa lupang pagtatamnan at sa kapaligiran.

Bukod sa isang milyong ektaryang naitakda na para sa mga *biofuel*, balak maglaan para rito ng apat na milyon pang ektaryang lupain. Ang mga kasalukuyang pro-

yekto ay sumasaklaw na sa 725,300 ektarya.

Sa harap ng lumalala ngayong kagutuman, kasalatan sa pagkain at tumataas na presyo nito, malakas na ang panawagan para suspindihin o tuluyang ibasura ang Biofuels Act at sa halip ay bigyang-prayoridad ang pagtitiyak sa seguridad ng bansa sa pagkain.

Partikular na umaani ng matinding batikos ang pagbaling ng malalawak na taniman at malaking bahagi ng ani ng tubo tungo sa produksyon ng *ethanol*. Bukod pa sa nakapagpapataas ito ng presyo ng asukal sa pamilihan, ginagamit ng mga may-ari ng plantasyon ng

tubo ang pagtatayo ng mga planta ng *ethanol* at pagbaling ng kanilang mga ani sa gayong produksyon para makaiwas sa Comprehensive Agrarian Reform Program. Sa pamamagitan ng iskemang ito, sinisikap iiwas ng pamilyang Arroyo na masaklaw ng CARP ang 157-ektaryang Hacienda Bacan at iba pa nilang mga asyenda sa Negros.

Napakalaki rin ng kikitain ng mga Arroyo kapag nakapagtayo na sila ng pagawaan ng *ethanol* sa kanilang lupa. Ang isang planta na may kapasidad na magmanupaktura ng 100,000 litro kada araw ay pwedeng tumabo ng di bababa sa ₱3.2 milyon. Kapag ibebenta naman ang tubo para sa produksyon ng *ethanol*, pwede silang kumita ng ₱65,000 bawat taon bawat ektarya.

Nagdadagsaan na rin sa mga plantasyon ng tubo sa Negros at Panay ang malalaking dayuhang kumpanya para magtayo ng mga planta ng *ethanol* at ibaling sa produksyon ng mga *biofuel* ang papalaking bahagi ng inaaning tubo. **AB**

Lider ng KMP sa Davao City, pinaslang

Pagpaslang sa isang lider-magsasaka sa Davao at pagdukot sa isang konsultant ng NDF mula sa Cagayan Valley ang tampok na mga paglabag sa karapatang-tao nitong mga nakalipas na linggo.

Mayo 15. Pinatay ang isang lider ng Kilusang Magbubukid ng Pilipinas (KMP) sa Davao City dakong alas-6:30 ng umaga. Kinilala ang biktima na si Celso Pojas, 45 anyos, tagapagsalita ng KMP sa Southern Mindanao at pangkalahatang kalihim ng Farmers Association in Davao City (FADC). Si Pojas ay bumibili ng sigarilyo malapit sa upisina ng FADC sa Bugac, Maa, Davao City nang siya ay lapitan at pagbabarilin ng dalawang armadong lalaking sakay ng motorsiklo. Papunta sana si Pojas sa isang misyong medikal sa Compostela Valley para bisitahin ang mga bakwit doon. Bago ito ay ilang beses siyang binantaan ng militar dahil sa kanilang kampanya laban sa militarisasyon sa naturang prubinsya. Siya ang ika-904 na biktima ng ekstrahudisyal na pamamaslang at ika-105 na lider ng KMP na pinatay sa ilalim ng rehimgeng Arroyo.

Dinukot din noong araw na iyon ang isang konsultant ng NDF sa Cagayan Valley at dating lider ng College Editors Guild of the Philippines (CEGP). Si Randy Malayao, 38, ay papunta sa kanyang kamag-anak sa Rosario, Pasig nang siya ay damputin ng mga elemento ng 5th ID at CIDG. Pinagkaitan siya ng karapatang makipag-ugnayan sa kanyang mga kamag-anak at abugado at ipinresenta lamang sa midya matapos ang limang araw. Si Malayao ang Vice President for Visayas ng CEGP noong 1991 at dating punong patnugot ng *Ang Mangingisda*, ang pahayagang

pangkampus ng University of the Philippines sa Miag-ao, Iloilo.

Mayo 14. Nasugatan ang dalawang sibilyan matapos mabari ng mga elemento ng 78th IB sa isang engkwentro sa pagitan ng militar at BHB sa Barangay Igcabugao, Igbaras, Iloilo. Ang mga biktima ay sina Jose Gabion, 40, at anak niyang si Jessica, 10 anyos. Naglakad ng 10 kilometro ang mga sibilyang tumulong sa kanila para madala sila sa ospital. Sa halip na tumulong din, nagmadali pang umalis ang mga sundalo.

Mayo 7. Binugbog ng mga sundalo ang isang punong barangay sa Roxas, North Cotabato kasama ang tatlong iba pa. Si Jimmy Requeta, kapitan ng Barangay Ilustre at presidente ng Association of Barangay Captains sa kanilang bayan ay pinalibutan ng limang sundalo sa tabing haywey matapos ang isang ambus na inilunsad ng Bagong Hukbong Bayan sa mga sundalo ng 39th IB. Pinaratangan ng mga militar na kasabwat si Requeta ng BHB kaya siya pinag-initan at binugbog. Pinahilera rin at pinaluhod ng mga sundalo sa haywey ang lahat ng mga lalaki sa kanilang baryo at pinagtatanong hinggil sa nalalaman nila umano tungkol sa ambus. Kagyat na iniulat ni Requeta sa meyor ng kanilang bayan ang pambubugbog. Plano rin niyang magsampa ng kaso laban sa mga sundalong nanakit sa kanila.

Noong araw ding iyon, minanmanan at hinaras ng isang nagpakilalang ahente ng Intelligence Service of the AFP si Glaiza Dimapilis, 19 anyos, pangkalahatang kalihim ng National Union of Students in the Philippines-National Capital Region at tagapangulo ng Student Council ng Philippine Christian University. Ayon kay Dimapilis, nang siya ay pauwi na sa kanilang tahanan ay sinundan siya ni Mike Santos, isa umanong ahente ng ISAFP, at binalaan siya na nasa *order of battle* siya at mayroon nang *shoot to kill order* o kaya'y pwe-

de nang hulihin anumang oras kahit walang mandamyento de aresto. Kinausap din ni Santos ang mga magulang ni Dimapilis noong umaga ng Mayo 9 upang pahintuin si Glaiza sa kanyang mga aktibidad. Pinapupunta rin ang mga magulang niya sa kampo militar na malapit sa kanilang bahay para makausap umano ng mga upisyal militar. Inalok din ni Santos si Dimapilis na maging aset ng militar subalit tumanggi ang lider-estudyante.

Abril 29. Pinaslang ng mga elemento ng Special Civilian Auxiliary Army (SCAA) at paramilitar na grupong Black Fighter si Datu Doming Diarog sa kanyang bahay sa Sityo Kahusayan, Barangay Manuel Guianga, Calinan, Davao City. Pinupog ng 17 bala ng M14 si Diarog, lider ng tribong Guiangan-Clata. Nasugatan din sa pamamail ang kanyang asawang si Emily at dalawa sa kanilang mga anak na edad 4 at 8 anyos. Si Diarog ay pinatay dahil sa pagtanggap niyang ibenta ang kanyang dalawang ektaryang lupa kay Apollo Quiboloy, lider ng isang lokal na kulto na malapit sa militar





at kay Rodrigo Duterte, meyor ng Davao City. Ang lupa ni Diarog ay nasa pagitan ng Prayer Mountain at isang magubat na lugar na parehong pagmamay-ari ni Quiboloy. Sadyang inorganisa ng 73rd IB/Task Force Davao sa ilalim ni Lt. Col. Alexander Ambal ang SCAA at ang Black Fighter para protektahan ang interes ni Quiboloy na malaon nang nang-aagaw ng lupa mula sa mga pambansang minorya sa lugar.

Abril 17. Pinagkaitan ng militar ng karapatang makipagkita sa kanyang ina ang detenidong si Rose Ann Gumanoy, 21 anyos, myembro ng Kasama-TK. Si Rose Ann ay dinetine sa AFP Medical Center sa V. Luna, Quezon City matapos masugatan sa pamamaril ng mga elemento ng 202nd Bde. Lumabas na lamang ang doktor na gumagamot kay Rose Ann para kausapin si Gng. Gumanoy dahil hindi man lamang pinalampas ng militar sa tarangkahan ng ospital ang ina ng biktima.

Ayon sa kanyang salaysay, si Rose Ann ay dumadalaw noong Abril 15 sa pamilya Carcer sa kanilang bahay sa Sityo Macalla, Barangay Pagsangahan, General Nakar, Quezon nang paputukan sila ng mga sundalo. Nasugatan din sa pamamaril sina Merie Carcer, 50 anyos, at anak niyang si Christine, 7 anyos, na tinamaan sa kaliwang sakong. Pinaratangan ng militar si Rose Ann na myembro ng BHB at

sinampahan na ng kasong rebelyon sa RTC Branch

65 ng Infanta, Quezon.

Siya ay anak ng martir na magsasaka na si Eddie Gumanoy na pinaslang ng mga berdugo



Paglapastangan sa bangkay ng Pulang mandirigma, kinundena

Kinundena ng Agustin Begnalen Command (ABC) ng Bagong Hukbong Bayan sa Abra at ng mamamayan ng Tubo, Abra ang kahayupang ginawa ng 50th IB at lantaran nitong paglabag sa Protokol 1 ng Geneva Conventions at sa Comprehensive Agreement on Respect for Human Rights and International Humanitarian Law.

Partikular nilang kinundena sina 1Lt. John Pedregosa at 1Lt. Abdul Rashid Avila, mga punong upisyal ng "C" Coy ng 50th IB dahil sa pagpugot nila at paglapastangan sa bangkay ni Sammy Rey "Ka Cholo" Cayago, isang Pulang mandirigmang napaslang sa pakikipaglaban sa militar noong Marso 24 sa Tubtuba, Tubo, Abra.

Ayon sa mga tagabaryo, ipinagyabang sa kanila ng mga sundalo ng "C" Coy kung paano nila tinadtad ng mahigit 50 bala ang bangkay ni Ka Cholo at kung paano pinugutan ni 2Lieutenant Avila ang patay na mandirigma gamit ang isang itak. Isa pang sundalo ang kumuha ng malaking batong ibinagsak nito sa pugot na ulo, na siyang dumurog sa likurang bahagi ng bungo ni Ka Cholo.

Di pa nagkasya, pinutol din nila ang isang kamay at isang paa ng mandirigma.

Sa kabila ng patuloy na operasyon ng 50th IB at 52nd Recon Coy sa hangganan ng Abra, Mountain Province at Ilocos Sur ay halos isang buwang pinagsikapang galugarin ng mga Pulang gerilya ang lugar na pinaglabanan para mabawi ang mga labi ni Ka Cholo at maibigay ito sa kanyang mga magulang. Nakuha nila ang kanyang naaagnas nang bangkay noong Abril 21.

Ang kahayupang ginawa ng 50th IB kay Ka Cholo ay pinakahuli lamang sa mahabang listahan na ng mga karumal-dumal nilang krimen laban sa mamamayan at rebolusyonaryong kilusan.

Planong magsampa ng pormal na kaso ang Agustin Begnalen Command at pamilya ni Ka Cholo sa Joint Monitoring Committee laban sa 50th IB at 503rd Infantry Brigade. Isinumpa rin ng ABC na pagbabayaran nang mahal ng 50th IB ang kalapastanganang ginawa nila kay Ka Cholo.

AB

ni Jovito Palparan sa Mindoro Oriental noong Abril 2003.

Marso 4. Tinangkang dukutin ang 12 anyos na anak na babae ni Rodolfo "Jun" Lozada Jr. na testigo sa anomalyang NBN-ZTE. Inilahad ito ni Lozada sa isang *press conference* sa National Press Club. Sinabi ni Lozada na may nagpanggap na isang tauhang panseguridad ng Senado na susundo sa anak niya pa-uwi sa kanilang tahanan. Nagduda

ang kanyang anak kaya tumawag ito sa kanyang ina subalit sinabi ng asawa ni Lozada na huwag sumama sa nasabing tao. Ayon kay Lozada, isang drayber ng Philippine Forest Corporation ang nagtangkang dumukot sa kanyang anak. Bahagi lang umano ito ng pagpapatahimik sa kanya at pananakot ng rehimen sa kanyang pamilya dahil sa kanyang patuloy na pagsisiwalat sa iskandalo sa NBN-ZTE.

AB

Malawakang tigil-pasada

UMABOT sa mahigit 80% ng transportasyon sa ilang lunsod ng Metro Manila, Visayas at Mindanao ang naparalisa sa malawakang tigil-pasada na inilunsad ng mga drayber sa buong bansa noong Mayo 12. Pinangunahan ng Pinagkaisang Samahan ng Tsuper at Operator Nationwide (PISTON) ang tigil-pasada bilang protesta sa patuloy na pagtataas sa presyo ng mga produktong petrolyo. Kabilang sa kanilang kahilingan ang pagbabasura sa Oil Deregulation Law at ang pag-aalis ng 12% *value added tax* sa mga

produktong petrolyo na magrere-sulta sa pagbawas ng P4-5 sa presyo ng gasolina at *diesel* at P75 sa *liquefied petroleum gas*.

Bunga ng tigil-pasada ay iniutos ng gubyernong Arroyo ang probisyunal na pagtataas sa pamasaha sa mga dyip at bus sa Metro Manila, Central Luzon at Southern Tagalog. Anang PISTON, halos walang epekto ang hakbang na ito sa mga drayber na hirap umagapay sa walang awat na pagsirit ng presyo ng langis. Patuloy nilang iginigiit ang kanilang mga kahilingan.

Ka Bel, pumanaw na

NAMATAY ang beteranong lider-manggagawa at progresibong parlamentaristang si Crispin "Ka Bel" Beltran, 75, dakong alas-11:48 ng umaga nitong Mayo 20. Sanhi ng kanyang kamatayan ang tinamo niyang sugat sa ulo nang mahulog siya habang nagkukumpuni ng bubong ng kanilang bahay sa San Jose del Monte, Bulacan.

Nagpahayag ng pakikidalamhati ang National Democratic Front of the Philippines; mga kasama niyang progresibong kongresista sa pangunguna ni Rep. Satur Ocampo ng Bayan Muna; mga kapwa niya unyonista sa Kilusang Mayo Uno (KMU); mga lider-militante tulad ni Ka Rafael Mariano, tagapangulo ng Kilusang Magbubukid ng Pilipinas (KMP) at presidente ng partidong Anakpawis; mga lider at myembro ng Bagong Alyansang Makabayan at mga alyadong organisasyon nito; mga kasama sa oposisyon sa Kongreso; at marami pang iba.

Mula sa parlamento ng kalsada hanggang sa bulwagan ng Kongreso, hindi natigil si Ka Bel sa kanyang pakikibaka para sa kapakanan ng mga manggagawa at uring anakpawis. Dahil dito ay dalawang beses siyang ikinulong ng reaksyunaryong estado noong panahon ng diktadurang US-Marcos, at muli, noong Pebrero 2006 nang magdeklara si Arroyo ng *state of national emergency*. Bago siya namatay ay nakatakda siyang magtalumpati sa Kongreso para muling ipanawagan ang pagsasabatas ng Genuine Agrarian Reform Bill at P125 dagdag na sahod. Nitong huli ay naging tampok ang kanyang partisipasyon sa mga talakayan sa Kongreso hinggil sa mataas na singil sa kuryente.

Si Ka Bel ay kaagapay ni Ka Felixberto (Ka Bert) Olalia sa pagsusulong ng militanteng kilusang manggagawa. Isa siya sa mga tagapagtatag ng Kilusang Mayo Uno (KMU) at naging tagapangulo nito nang yumao ang unang tagapangulo nitong si Ka Bert. Mula 2001 ay naging kinatawan siya ng mga progresibong partido sa Kongreso, una ng Bayan Muna at kalaunan ng Anakpawis noong 2004.

Matrikula, tataas na naman

INAASAHANG tataas ang matrikula ngayong Hunyo sa mahigit 300 pribadong paaralan dahil sa pagsuspindi ng Malacañang sa Memorandum Order No. 14 na nagbabawal sa mga pribadong paaralan na magtaas ng matrikula lampas sa umiiral na tantos ng implasyon.

Ayon sa League of Filipino Students, tinatayang bababa nang 50% ang enrolment sa mga pribadong paaralan dahil sa pagtaas ng matrikula.

Mga tropang Malaysian, umalis sa Mindanao bilang protesta

PINAUWI na ng Malaysia noong Mayo 12 ang 28 sa 41 sundalo at mga upisyal ng pulisya nito na kabilang sa International Monitoring Team na itinalaga sa iba't ibang lugar sa Mindanao. Ito'y bilang protesta sa di pag-usad ng usapang pangkapayapaan sa gitna ng pagbasura ng Gubyerno ng Republika ng Pilipinas sa nauna nang mga naring na kasunduan sa Moro Islamic Liberation Front (MILF).

Noong Disyembre 2007, ikinalalit ng mga negosyador ng MILF ang paggigiit ng rehimeng Arroyo na ang mga napagkasunduan na ng magkabilang panig sa loob ng mahigit tatlong taong usapan ay dapat sumang-ayon sa konstitusyon ng Pilipinas. Ayon sa MILF, halatang gusto talagang bumaling sa pakikipagdigma ang rehimeng Arroyo matapos nitong ibasura at labagin ang 49 na kaisahan sa isyu ng lupang ninuno na pumapatungkol sa laki ng teritoryo na dapat pangangasiwaan ng mga Moro.

Ang nalalabi pang mga myembro ng International Monitoring Team ay nakatakda na ring umalis bago mag-Setyembre.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXIX Blg. 10
Mayo 21, 2008
www.philippinerevolution.net

Editorial

Lahatang-panig na umaabante ang armadong rebolusyonaryong kilusan

Katulad ng nabigong sinundan niya, panay din ang buladas ng bagong Armed Forces of the Philippines Chief of Staff na si Lt. Gen. Alexander Yano. Itutuloy daw niya ang umano'y natamo nang bwelo ng pinalitan niyang si Gen. Hermogenes Esperon upang mawalan ng saysay ang armadong rebolusyonaryong kilusan pagsapit ng 2010. Sinuhayan pa ito ng bulaang pahayag ng amo nilang si Gloria Arroyo na lahat daw ng palatandaan ay nagpapatunay na bumubulusok na ang lakas ng Bagong Hukbong Bayan (BHB).

Pinasisinungalingan ito ng mga ulat ng lahatang-panig na mga pagsulong sa iba't ibang rehiyon at larangang gerilya sa buong bansa. Kabilang dito ang paglaki ng kasapian ng Partido, hukbong bayan at mga rebolusyonaryong organisasyong masa; pagdami ng mga larangan, sona at baseng gerilya; pagtamo ng mamamayan ng mga benepisyo sa pamamagitan ng rebolusyong agraryo at iba pang masisiglang



Mga tampok sa isyung ito...

35 armas, nasamsam ng BHB sa Mindanao
PAHINA 3

Rebolusyonaryong pagsulong sa Cagayan Valley
PAHINA 4

Pangkatong sa lumalalang kagutuman
PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com